



ҮНДЭСНИЙ АУДИТЫН ТАЙЛАН

ХУРААНГУЙ ТАЙЛАН

АУДИТЫН СЭДЭВ: ЗАСГИЙН ГАЗРЫН ҮЙЛ АЖИЛЛАГААНЫ ХӨТӨЛБӨРИЙН ГҮЙЦЭТГЭЛИЙН ТАЙЛАН

Аудит хийсэн үндэслэл, бүрэн эрх

Аудитыг Төрийн аудитын тухай хуулийн 6 дугаар зүйлийн 6.3.1-д заасан Үндэсний аудитын газрын бүрэн эрх, УИХ-ын 2023 оны 08 дугаар тогтоолоор баталсан “Төрийн аудитын байгууллагын 2024 онд гүйцэтгэх аудитын сэдэв”, МУЕА-ын 2023 оны А/162 дугаар тушаалаар баталсан “Төрийн аудитын байгууллагын 2024 онд гүйцэтгэх аудитын төлөвлөгөө”-г үндэслэн гүйцэтгэв.

**Монгол Улсын Засгийн газрын 2020-2024 оны үйл
ажиллагааны хөтөлбөрийг хэрэгжүүлэгч байгууллагын
уялдаа холбоог сайжруулж, зорилтыг бүрэн хэрэгжүүлэхэд
анхаарч ажиллах шаардлагатай байна**

Аудитын тайланг хүргүүлсэн:

УИХ-ын Төсвийн байнгын хороо, Эдийн засгийн байнгын хороо, ЗГХЭГ, ЗГХХГ, БОАЖЯ, БХБЯ, БХЯ, БШУЯ, ГХЯ, ЗТХЯ, СаЯ, СоЯ, УУХҮЯ, ХХААХҮЯ, ХЗДХЯ, ХНХЯ, ЦХХХЯ, ЭЗХЯ, ЭМЯ, ЭХЯ, БТСУХ, ОБЕГ, СХЗГ, ТӨБЗГ, ТЕГ, ШӨХТГ-т тус тус хүргүүлсэн.

Улаанбаатар хот
2024 оны 03 дугаар сар

Аудитын харилцан хамаарал	Хөгжлийн бодлого төлөвлөлт түүний удирдлагын тухай хуулийн 4 дүгээр зүйлийн 4.1.18-т “Засгийн газрын үйл ажиллагааны хөтөлбөр” гэж Монгол Улсын урт хугацааны хөгжлийн бодлогод тусгагдсан зорилго, зорилтод нийцсэн, Монгол Улсыг хөгжүүлэх таван жилийн үндсэн чиглэлийг хэрэгжүүлэхэд чиглэсэн төлөвлөлтийн баримт бичгийг, 4.1.9. “Засгийн газрын үйл ажиллагааны хөтөлбөрийг хэрэгжүүлэх арга хэмжээний төлөвлөгөө” гэж Засгийн газрын үйл ажиллагааны хөтөлбөрийн зорилго, зорилтыг хэрэгжүүлэхэд чиглэсэн төсөл, арга хэмжээг төсөв, санхүүгийн тооцоо, эх үүсвэртэй нь уялдуулан нарийвчлан төлөвлөсөн баримт бичгийг” гэж тус тус заасан байна. “Монгол Улсыг 2021-2025 онд хөгжүүлэх таван жилийн Үндсэн чиглэл”¹ дунд хугацааны хөгжлийн бодлого, “Монгол Улсын Засгийн газрын 2020-2024 оны үйл ажиллагааны хөтөлбөр”², “Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”³ дунд хугацааны хөгжлийн бодлогын баримт бичгийг үндэслэн улс орны хөгжлийг тодорхойлж, чиглүүлж байна.
Аудитын зорилго, зорилтууд	Засгийн газрын үйл ажиллагааны хөтөлбөрийн гүйцэтгэлийн хэрэгжилтийг дүгнэж, дүгнэлт, зөвлөмжийг боловсруулан холбогдох байгууллага, албан тушаалтанд танилцуулахад аудитын зорилго чиглэсэн. Аудитын зорилгыг хангахын тулд аудитыг дараах зорилтын хүрээнд гүйцэтгэв. Үүнд: 1. Засгийн газрын үйл ажиллагааны хөтөлбөрийн зорилго бүрэн биелсэн эсэх. 2. Засгийн газрын үйл ажиллагааны хөтөлбөрийн гүйцэтгэлийг бодитой үнэлж, тайлагнасан эсэх.
Аудитын хамарсан хүрээ	Аудитад Хөгжлийн бодлого төлөвлөлт, түүний удирдлагын тухай хуулийн хүрээнд “Монгол Улсын Засгийн газрын 2020-2024 оны үйл ажиллагааны хөтөлбөр” дунд хугацааны бодлогын баримт бичиг, Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөөнд тусгасан 6 бодлого, 23 зорилго, 261 зорилт, 1046 арга хэмжээний хэрэгжилтэд хяналт-шинжилгээ, үнэлгээ хийх, гүйцэтгэлийг дүгнэх, тайлагнах үүрэгтэй хэрэгжүүлэгч байгууллага, улсын хэмжээнд нэгтгэн үнэлгээ, дүгнэлт гаргах, тайлагнах төрийн захиргааны төв байгууллага, тэдгээрийн ажлын албадын 2021-2023 оны үйл ажиллагаа хамрагдсан болно.

¹ УИХ-ын 2020 оны 08 сарын 28-ны өдрийн 23 дугаар тогтоол “Монгол Улсыг 2021-2025 онд хөгжүүлэх таван жилийн Үндсэн чиглэл батлах тухай;

² УИХ-ын 2020 оны 8 дугаар сарын 28-ны өдрийн 24 дүгээр тогтоолоор баталсан “Монгол Улсын Засгийн газрын 2020-2024 оны үйл ажиллагааны хөтөлбөр”;

³ Засгийн газрын 2020 оны 12 дугаар сарын 09-ний өдрийн 203 дугаар тогтоолоор баталсан “Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”

Ерөнхий мэдээлэл

УИХ-ын 2020 оны 08 дугаар сарын 28-ны өдрийн 24 дүгээр тогтоолоор баталсан “Монгол Улсын Засгийн газрын 2020-2024 оны үйл ажиллагааны хөтөлбөр”, Засгийн газрын 2020 оны 12 дугаар сарын 09-ний өдрийн 203 дугаар тогтоолоор баталсан “Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-нд 2021-2023 оны хооронд 6 бодлого, 23 зорилго, 261 зорилтын хүрээнд 1046 арга хэмжээг 154 шалгуур үзүүлэлт, хүрэх түвшинтэй, үндсэн хэрэгжүүлэгч 16 яам, 8 тохируулагч, 2 хэрэгжүүлэгч агентлаг, аймаг, нийслэлийн ЗДТГ, зарим төрийн өмчит хуулийн этгээд хэрэгжүүлсэн байна.

Засгийн газрын 2020 оны 12 дугаар сарын 09-ний өдрийн 203 дугаар тогтоолоор баталсан “Монгол Улсын Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-ний 6 бодлогын хэрэгжилт 2021-2023 оны байдлаар үр дүн 70.5 хувийн биелэлттэй байна. Үүнд:

Хүснэгт 1. Засгийн газрын 2020-2024 оны үйл ажиллагааны хөтөлбөрийг хэрэгжүүлэх 6 бодлогын 1046 арга хэмжээний хэрэгжилтийн түвшин, бодлогын үнэлгээний нэгтгэл

Бодлогын дугаар	Бодлогын нэр	Зорилго	Зорилт	Арга хэмжээний тоо	Хэрэгжилтийн түвшин /тоогоор/				Бодлогын биелэлт, үнэлгээ /хувь/
					Үр дүнтэй	Тодорхой үр дүнд хүрсэн	Эрчимжүүлэх шаардлагатай	Үр дүнгүй	
Нэг	“Ковид-19” халдварт цар тахлаас үүдэлтэй эдийн засаг, нийгмийн хүндрэлийг даван туулах бодлого	1	15	38	22	13	0	3	83
Хоёр	Хүний хөгжлийн бодлого	6	55	263	77	86	71	29	67
Гурав	Эдийн Засгийн бодлого	7	82	391	100	107	115	69	59
Дөрөв	Засаглалын бодлого	6	70	275	98	95	65	17	74
Тав	Ногоон Хөгжлийн бодлого	1	12	34	13	8	7	6	67
Зургаа	Нийслэл ба бүс, орон нутгийн хөгжлийн бодлого	2	27	45	16	15	13	1	73
Нийт дүн		23	261	1046	326	324	271	125	70.5

Эх сурвалж: УАГ-ын судалгааны нэгтгэл

Засгийн газрын 2020 оны 203 дугаар тогтоолын 2 дугаар хавсралтаар баталсан “Монгол Улсын Засгийн газрын 2020-2024 оны үйл ажиллагааны хөтөлбөрийн хэрэгжилтийн хяналт-шинжилгээ, үнэлгээний шалгуур үзүүлэлт, хүрэх түвшин”-д нийт 6 бодлогын 48 зорилгын хүрээнд 154 шалгуур үзүүлэлтийг тусгахдаа “Ковид-19” халдварт цар тахлаас үүдэлтэй эдийн засаг, нийгмийн хүндрэлийг даван туулах бодлогын “Цар тахлын үеийн хүн, амын эрүүл мэндийг хамгаалах, болзошгүй эрсдэлийг бууруулах, нийгэм, эдийн засгийн хүндрэлийг даван туулах чиглэлээр шуурхай арга хэмжээг авч хэрэгжүүлсэн байдал” гэсэн шалгуур үзүүлэлтийг хүрэх түвшингүй баталсан байна.

Харин “Хүний хөгжлийн бодлого”-ын 6 зорилго, Эдийн засгийн бодлогын 7 зорилго, Засаглалын бодлогын 6 зорилго, Ногоон хөгжил бодлогын 1 зорилго, Нийслэл ба бүс, орон нутгийн хөгжлийн бодлогын 2 зорилгын хүрээнд нийт 153 шалгуур үзүүлэлтийг хүрэх түвшинг баталсан бөгөөд 2021-2023 оны хооронд 80 шалгуур үзүүлэлтийн хүрэх түвшин хангагдаж 52.3 хувь, 72 шалгуур үзүүлэлтийн хүрэх түвшин хангагдаагүй буюу 47.1 хувийг эзэлж байна. Үүнд:

Хүснэгт 2. Засгийн газрын 2020-2024 оны үйл ажиллагааны хөтөлбөрийн хэрэгжилтийн хяналт-шинжилгээ, үнэлгээний шалгуур үзүүлэлт, хүрэх түвшингийн 2021-2023 оны хүрсэн түвшний нэгтгэл

Бодлогын дугаар	Бодлогын нэр	Зорилгын тоо	Шалгуур үзүүлэлтийн тоо	2021-2023 онд хүрсэн түвшин /тоогоор/	
				хүрсэн	хүрээгүй
Хоёр	Хүний хөгжлийн бодлого	6	44	20	23
Гурав	Эдийн Засгийн бодлого	7	52	31	21
Дөрөв	Засаглалын бодлого	6	30	15	15
Тав	Ногоон Хөгжлийн бодлого	1	14	6	8
Зургаа	Нийслэл ба бүс, орон нутгийн хөгжлийн бодлого	2	13	8	5
Нийт дүн		23	153	80	72

Эх сурвалж: УАГ-ын судалгааны нэгтгэл

“Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-нд тусгагдсан 153 шалгуур үзүүлэлт, хүрэх түвшинтэй УИХ-ын 2020 оны 23 дугаар тогтоолын 1 дэх заалтаар “Монгол Улсыг 2021-2025 онд хөгжүүлэх таван жилийн үндсэн чиглэл”, түүний хэрэгжилтийн хяналт-шинжилгээ, үнэлгээний шалгуур үзүүлэлт, хүрэх түвшнийг 95 шалгуур үзүүлэлтээс 61 шалгуур үзүүлэлт буюу 64.2 хувь нь уялдсанаас 2021-2023 оны үр дүнгээр 17 шалгуур үзүүлэлтийн үр дүн нь хангагдаж 27.9 хувийн хэрэгжилттэй, 44 шалгуур үзүүлэлтийн хүрэх түвшин хэрэгжих шатанд байна.

БҮЛЭГ 1. ЗАСГИЙН ГАЗРЫН ҮЙЛ АЖИЛЛАГААНЫ ХӨТӨЛБӨРИЙН 2021-2023 ОНЫ БИЕЛЭЛТ 70.5 ХУВЬТАЙ БУЮУ ДУНД ХУГАЦААНЫ ЗОРИЛТЫГ БҮРЭН ХАНГААГҮЙ БАЙНА

НЭГ. “КОВИД-19” ХАЛДВАРТ ЦАР ТАХЛААС ҮҮДЭЛТЭЙ ЭДИЙН ЗАСАГ, НИЙГМИЙН ХҮНДРЭЛИЙГ ДАВАН ТУУЛАХ БОДЛОГО

“Ковид-19” халдварт цар тахлаас үүдэлтэй эдийн засаг, нийгмийн хүндрэлийг даван туулах бодлогын хүрээнд 1 зорилго, 15 зорилтын 38 арга хэмжээнээс үр дүнтэй хэрэгжсэн 22 буюу 57.9 хувь, тодорхой үр дүнд хүрсэн 13 буюу 34.2 хувь, үр дүнгүй арга хэмжээ 3 буюу 7.9 хувийг эзлэж, нийт бодлогын хэрэгжилт 83.0 хувьтай буюу тодорхой үр дүнд хүрсэн байна.

“Ковид-19” халдварт цар тахлаас үүдэлтэй эдийн засаг, нийгмийн хүндрэлийг даван туулах бодлогод тусгасан арга хэмжээг хэрэгжүүлэхэд улсын төсвөөс 4,837.2 тэрбум, гадаадын зээл тусламжаас 245.7 тэрбум нийт 5,142.3 тэрбум төгрөг баталсан байна. Үүнээс улсын төсвөөс 4,687.1 тэрбум, гадаадын зээл тусламжаас 590.5 тэрбум нийт 5,321.2 тэрбум төгрөг тус тус зарцуулсан байна.

ХОЁР. ХҮНИЙ ХӨГЖЛИЙН БОДЛОГО

“Хүний хөгжлийн бодлого”-ын 6 зорилго 55 зорилтын хүрээнд 44 шалгуур үзүүлэлт, 263 арга хэмжээг 2021-2023 онд хэрэгжүүлэхдээ 6 зорилгын 77 буюу 29.3 хувь нь үр дүнтэй хэрэгжиж, 85 буюу 32.3 хувь нь тодорхой үр дүнд хүрч, 5 зорилгын 21 шалгуур үзүүлэлтийн 71 буюу 27.0 хувь нь эрчимжүүлэх шаардлагатай, 30 буюу 11.4 хувь нь үр дүнгүй, бодлогын нийт хэрэгжилт 67 хувьтай буюу эрчимжүүлэх шаардлагатай байна.

“Хүний хөгжлийн бодлого”-д тусгасан арга хэмжээг хэрэгжүүлэхэд улсын төсвөөс 6,761.3 тэрбум, гадаадын зээл тусламжаас 349.5 тэрбум, орон нутгийн төсвөөс 15.5 тэрбум, Засгийн газрын тусгай сангаас 1,762.9 нийт 8,889.2 тэрбум төгрөг баталсан байна. Үүнээс улсын төсвөөс 4,274.4 тэрбум, гадаадын зээл тусламжаас 162.3 тэрбум, орон нутгийн төсвөөс 9.1 тэрбум, Засгийн газрын тусгай сангаас 2,430.1 тэрбум нийт 6,875.9 тэрбум төгрөг тус тус зарцуулсан байна.

ГУРАВ. ЭДИЙН ЗАСГИЙН БОДЛОГО

“Эдийн засгийн бодлого”-ын 7 зорилго 87 зорилтын хүрээнд 31 шалгуур үзүүлэлт, 391 арга хэмжээг 2021-2023 онд хэрэгжүүлэхдээ 2 зорилгын 13 шалгуур үзүүлэлтийн 100 буюу 25.6 хувь нь үр дүнтэй хэрэгжиж, 107 буюу 27.4 хувь нь тодорхой үр дүнд хүрч, 5 зорилгын 21 шалгуур үзүүлэлтийн 115 буюу 29.4 хувь нь эрчимжүүлэх шаардлагатай, 69 арга хэмжээ буюу 17.6 хувь нь үр дүнгүй, бодлогын нийт хэрэгжилт 59 хувьтай буюу эрчимжүүлэх шаардлагатай байна.

“Эдийн засгийн бодлого”-д тусгасан арга хэмжээг хэрэгжүүлэхэд улсын төсвөөс 2,491.1 тэрбум, гадаадын зээл тусламжаас 12,619.1 тэрбум, орон нутгийн төсвөөс 73.7 тэрбум, өөрийн хөрөнгөөс 4,929.3 тэрбум, Засгийн газрын тусгай сангаас 150.6 тэрбум нийт 20,263.7 тэрбум төгрөг баталсан байна. Үүнээс улсын төсвөөс 2,286.5 тэрбум, гадаадын зээл тусламжаас 10,316.4 тэрбум, орон нутгийн төсвөөс 64.0 тэрбум, өөрийн хөрөнгөөс 6,407.6 тэрбум бусад эх үүсвэрээс 60.1 тэрбум, Засгийн газрын тусгай сангаас 56.1 тэрбум нийт 19,190.7 тэрбум төгрөг тус тус зарцуулсан байна.

ДӨРӨВ. ЗАСАГЛАЛЫН БОДЛОГО

“Засаглалын бодлого”-ын 6 зорилго 70 зорилтын 275 арга хэмжээнээс 98 буюу 35.6 хувь үр дүнтэй, 95 буюу 34.5 хувь нь тодорхой үр дүнд хүрсэн, 65 буюу 23.6 хувь нь эрчимжүүлэх шаардлагатай, 17 буюу 6.2 хувь нь үр дүнгүй, бодлогын нийт хэрэгжилт 74 хувьтай буюу тодорхой үр дүнд хүрсэн байна.

“Засаглалын бодлого”-д тусгасан арга хэмжээг хэрэгжүүлэхэд улсын төсвөөс 436.5 тэрбум, гадаадын зээл тусламжаас 121.3 тэрбум, орон нутгийн төсвөөс 1.8 тэрбум, Засгийн газрын тусгай сангаас 117.1 тэрбум нийт 676.7 тэрбум төгрөг баталсан байна. Үүнээс улсын төсвөөс 274.6 тэрбум, гадаадын зээл тусламжаас 247.9 тэрбум, орон нутгийн төсвөөс 1.8 тэрбум, өөрийн хөрөнгөөс 3.1 тэрбум, хандиваас 104.5 тэрбум, Засгийн газрын тусгай сангаас 130.5 тэрбум нийт 762.5 тэрбум төгрөг тус тус зарцуулсан байна.

ТАВ. НОГООН ХӨГЖЛИЙН БОДЛОГО

“Ногоон хөгжлийн бодлого”-ын нийт 12 зорилтын 34 арга хэмжээнээс 13 буюу 38.2 хувь нь үр дүнтэй, 8 буюу 23.5 хувь нь тодорхой үр дүнд хүрч, 7 буюу 20.6 хувь нь эрчимжүүлэх шаардлагатай, 6 буюу 17.6 хувь нь үр дүнгүй, бодлогын нийт хэрэгжилт 67 хувьтай буюу эрчимжүүлэх шаардлагатай байна.

“Ногоон хөгжлийн бодлого”-д тусгасан арга хэмжээг хэрэгжүүлэхэд улсын төсвөөс 43.0 тэрбум, гадаадын зээл тусламжаас 0.2 тэрбум, орон нутгийн төсвөөс 41.9 тэрбум, нийт 85.1 тэрбум төгрөг баталсан байна. Үүнээс улсын төсвөөс 39.6 тэрбум, гадаадын зээл тусламжаас 0.3 тэрбум, орон нутгийн төсвөөс 29.1 тэрбум, нийт 69.0 тэрбум төгрөг тус тус зарцуулсан байна.

ЗУРГАА. НИЙСЛЭЛ БА БҮС ОРОН НУТГИЙН ХӨГЖЛИЙН БОДЛОГО

“Нийслэл ба бүс орон нутгийн хөгжлийн бодлого”-ын 2 зорилго, 27 зорилтын 45 арга хэмжээнээс үр дүнтэй 16 буюу 35.6 хувь, тодорхой үр дүнд хүрсэн 15 буюу 33.3 хувь, эрчимжүүлэх шаардлагатай 13 буюу 28.9 хувь, үр дүнгүй 1 буюу 2.2 хувиар хэрэгжиж, бодлогын нийт хэрэгжилт 73 хувьтай буюу тодорхой үр дүнд хүрсэн байна.

“Нийслэл ба бүс орон нутгийн хөгжлийн бодлого”-д тусгасан арга хэмжээг хэрэгжүүлэхэд улсын төсвөөс 1,514.5 тэрбум, гадаадын зээл тусламжаас 583.5 тэрбум, орон нутгийн төсвөөс 1,010.4 тэрбум, бусад эх үүсвэрээс 0.09 тэрбум, нийт 3,108.5 тэрбум төгрөг баталсан байна. Үүнээс улсын төсвөөс 1,367.3 тэрбум, гадаадын зээл тусламжаас 451.3 тэрбум, орон нутгийн төсвөөс 765.2 тэрбум, нийт 2,583.8 тэрбум төгрөг тус тус зарцуулсан байна.

БҮЛЭГ 2. ЗАСГИЙН ГАЗРЫН ҮЙЛ АЖИЛЛАГААНЫ ХӨТӨЛБӨРИЙН ХЭРЭГЖИЛТИЙН ХҮРСЭН ТҮВШНИЙ ҮНЭН, ЗӨВ ЭСЭХИЙГ НЯГТЛАН ШАЛГААГҮЙ, НОТЛОХ БАРИМТАД ҮНДЭСЛЭН ХЯНАЛТ-ШИНЖИЛГЭЭ, ҮНЭЛГЭЭГ ХИЙГЭЭГҮЙ БАЙНА

“ШИЛЭН ДАНСНЫ ХӨТӨЛӨЛТИЙН НЭГДСЭН ҮНЭЛГЭЭ”-НИЙ ТАЙЛАНГ САНГИЙН ЯАМНААС ГАРГАСАН БАЙНА

Төрийн захиргааны төв байгууллагаас тухайн жилийн үйл ажиллагааны үр дүнд хийсэн хяналт-шинжилгээ, үнэлгээний тайланг ЗГХЭГ-т хүргүүлэхээр "Бодлогын баримт бичгийн хэрэгжилт болон захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам"-ын 9.1⁴-т заасны дагуу “шилэн дансны хөтөлөлтийн үнэлгээ”-г тайлагнахаар журамласан ч 2021-2022 онд ЗГХЭГ-т хүргүүлээгүй, харин Сангийн яаманд 6 байгууллага нь шилэн дансны хөтөлөлтийн үнэлгээний дүнг цаасаар хүргүүлж, 7 байгууллага /БХЯ, БШУЯ, УУХУЯ, ХНХЯ, ЭЗХЯ, ЭХЯ, НЗДТГ/ “Шилэн дансны нэгдсэн” цахим системд тайлагнаж, 1 байгууллага /ТӨБЗГ/ шилэн данс хөтөлөлтийн үнэлгээг гаргаагүй байна.

Харин Сангийн яамнаас 2020, 2021, 2022 оны үйл ажиллагааны үр дүнд шилэн дансны хөтөлөлтийн нэгдсэн үнэлгээг "Бодлогын баримт бичгийн хэрэгжилт болон захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам"-ын 9.8⁵ дахь заалтын дагуу гарсан байна.

ЗАСГИЙН ГАЗРЫН ҮЙЛ АЖИЛЛАГААНЫ ХӨТӨЛБӨРИЙН АРГА ХЭМЖЭЭНИЙ ХҮРСЭН ТҮВШИН, ҮР ДҮНГ БОДИТОЙ ТАЙЛАГНААГҮЙ, АРГА ХЭМЖЭЭНИЙ ХЭРЭГЖИЛТИЙГ БАРИМТ НОТЛОГООНД ҮНДЭСЛЭН ХЯНАЛТ-ШИНЖИЛГЭЭ, ҮНЭЛГЭЭ ДҮГНЭЛТИЙГ ГАРГАЖ ХЭВШЭЭГҮЙ БАЙНА

Засгийн газраас Төрийн мэдээллийн сүлжээ www.unelgee.gov.mn цахим программыг ашиглаж хөгжлийн бодлогын баримт бичгийн хэрэгжилтийн тайлан, хяналт-шинжилгээ үнэлгээ, дүгнэлтийг үндсэн хариуцагч байгууллага, Засгийн газрын түвшинд нэгтгэн тайлагнаж байна.

“Хүний хөгжлийн бодлого”-ын 2.5.14⁶ зорилтын 2.5.14.1 дэх арга хэмжээ, 2.5.15⁷ зорилтын 2.5.15.1 дэх арга хэмжээ, “Эдийн засгийн бодлого”-ын 3.1.3⁸ зорилтын 3.1.3.1 дэх арга хэмжээний хэрэгжилтэд хамааралгүй асуудлыг тайлагнасан байна.

“Эдийн засгийн бодлого”-ын 3.1.6⁹, 3.1.8¹⁰, 3.1.13¹¹, 3.1.18¹² дахь зорилт, “Засаглалын бодлого”-ын 4.1.4¹³ дэх зорилтын дараах арга хэмжээний үндсэн хариуцагчийг “Сангийн яам”,

⁴ 9.1 Төрийн захиргааны төв байгууллага, аймаг, нийслэлийн Засаг дарга, түүний Тамгын газар нь тухайн жилийн үйл ажиллагааны үр дүнд хийсэн хяналт-шинжилгээ, үнэлгээний тайланг энэ журмын 6, 7 дугаар хавсралтын дагуу гаргаж тайланг Засгийн газрын Хэрэг эрхлэх газарт мөн журмын 1 дүгээр хавсралтад заасан хугацаанд хүргүүлнэ. Тайлан нь дараахь хавсралттай байна: 9.1.1. төрийн захиргааны төв байгууллага: 9.1.1.4. шилэн дансны хөтөлөлтийн үнэлгээ;

⁵ 9.8. Шилэн дансны хөтөлөлтийн үнэлгээг санхүү, төсвийн асуудал эрхэлсэн төрийн захиргааны төв байгууллага гаргаж Засгийн газрын Хэрэг эрхлэх газарт 3 дугаар сарын 1-ний өдрийн дотор хүргүүлнэ. Уг үнэлгээ нь захиргааны байгууллагын жилийн үйл ажиллагааны үнэлгээний нэг үзүүлэлт болно. (Засгийн газрын 2021 оны 374 дүгээр тогтоолоор өөрчлөлт орсон бөгөөд үүнийг 2022 оны 6 дугаар сарын 1-ний өдрөөс эхлэн дагаж мөрдөнө)

⁶ “Бүтээн байгуулалтын томоохон төслүүдийн үр дүнд болон хувийн хэвшил, жижиг, дунд үйлдвэрлэл, хөдөлмөр эрхлэлтийг дэмжих замаар 150 мянган ажлын байр шинээр бий болгоно”;

⁷ “Гадаадад сурч, хөдөлмөрлөж байгаа Монгол иргэдийг дэмжих, эх орондоо эргэн ирж ажиллаж хөдөлмөрлөхөд дэмжлэг үзүүлэх хөдөлмөрийн бирж бий болгоно”;

⁸ “Банкны салбарын шинэчлэлийг богино хугацаанд хийж, банк, санхүүгийн байгууллагуудын өөрийн хөрөнгийг нэмэгдүүлж, эдийн засгийн өсөлтийг өртөг багатай санхүүжилтээр дэмжиж, банкны зээлийн сарын хүүг 1 хувиас хэтрүүлэхгүй болгож, эрсдэл даах чадамжтай болгоно”;

⁹ Иргэдийг санхүүгийн эрсдэл, дарамтад өртөхөөс сэргийлэх, санхүүгийн хэрэглэгчийн эрх ашгийг хамгаалах хууль, эрх зүйн орчныг шинээр бүрдүүлэх замаар мөнгө хүүлэлтийг таслан зогсооно.;

¹⁰ Банк, санхүүгийн систем дэх чанаргүй зээлийг шуурхай, зардал багатай шийдвэрлэх хууль, эрх зүйн шинэчлэл хийнэ.;

¹¹ Бизнесийн шударга өрсөлдөөнийг дэмжсэн, хэрэглэгчийн эрх ашгийг хамгаалсан шинэчлэлийн бодлого хэрэгжүүлнэ.;

¹² Хилийн боомтуудын нэвтрүүлэх хүчин чадлыг нэмэгдүүлж, хөрш орнуудын хилийн боомтуудын жишигт хүргэнэ. Хилийн заставуудын барилга, объектуудыг шинэчилж чанарыг сайжруулна.;

¹³ Төрийн үйлчилгээнд мэдээлэл, харилцаа холбооны технологийн дэвшил, инновац нэвтрүүлэх замаар бүтээмж, үр ашгийг дээшлүүлнэ.;

“ТӨБЗГ” гэж баталсан байхад байгууллагын чиг үүрэгт хамааралгүй гэсэн үндэслэлээр Сангийн яам, ТӨБЗГ-ын хариуцан хэрэгжүүлэх арга хэмжээнээс хасах саналтай гэж цахим системд тайлагнасан ч хэрэгжилтийг 100 хувиар үнэлсэн нь бодитой бус байна.

Мөн “Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-нд нэмэлт өөрчлөлт ороогүй, үндсэн хариуцагч байгууллага өөрчлөгдсөн зохицуулалтыг хийгдээгүй байхад 3.1.6.1, 3.1.8.1, 3.1.13.5, 3.1.13.6 дахь арга хэмжээг **“байгууллагын чиг үүрэгт хамаарахгүй”, “хугацаа болоогүй”** гэсэн тайлбарыг оруулж ЗГХХГ-аас хяналт-шинжилгээ үнэлгээг хийгээгүй нь Засгийн газрын 2020 оны 206 дугаар тогтоолоор баталсан “Бодлогын баримт бичгийн хэрэгжилт болон захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам”-ын 5.2¹⁴-ын 5.2.3 “хяналт-шинжилгээ, үнэлгээний үнэлэлт, дүгнэлт, зөвлөмжийг хууль тогтоомж, баримт нотолгоонд үндэслэн гаргах” гэсэн үүргээ хэрэгжүүлээгүй байна.

Харин “Эдийн засгийн бодлого”-ын 3.7.2¹⁵ зорилтын 3.7.2.2, 3.7.2.3 дахь арга хэмжээ, “Нийслэл ба бүс, орон нутгийн хөгжлийн бодлого”-ын 6.2.11¹⁶ зорилтын 6.2.11.1 дэх арга хэмжээний хүрсэн түвшин, үр дүнг нотлох баримтад үндэслэж дүгнээгүй байна.

ЗАСГИЙН ГАЗРЫН ҮЙЛ АЖИЛЛАГААНЫ ХӨТӨЛБӨРИЙН ХЭРЭГЖИЛТИЙН НОТЛОХ БАРИМТЫН 76.2 ХУВИЙГ “ТӨРИЙН МЭДЭЭЛЛИЙН НЭГДСЭН ЦАХИМ САН”-Д БАЙРШУУЛААГҮЙ, ХӨТӨЛБӨРИЙН ХЭРЭГЖИЛТИЙН ТАЙЛАН, ХЯНАЛТ-ШИНЖИЛГЭЭ, ҮНЭЛГЭЭНИЙ ҮНЭЛЭЛТ, ДҮГНЭЛТИЙГ НОТЛОГООНД ҮНДЭСЛЭЖ ГАРГААГҮЙ БАЙНА

ЗГХЭГ-аас “Төрийн мэдээллийн нэгдсэн систем”-д 2021-2022 онд 3.1.19¹⁷ дэх зорилтын 3.1.19.1 дэх арга хэмжээ, 3.3.12¹⁸ дахь зорилтын 3.3.12.4, 3.3.12.5 дахь арга хэмжээ, 3.7.14¹⁹ дэх зорилтын 3.7.14.1.2, 3.7.14.3 дахь арга хэмжээ, 4.1.4²⁰ дэх зорилтын 4.1.4.4 дэх арга хэмжээ, урьдчилан байршуулаагүйгээс үндсэн хариуцагч Шадар сайдын харьяа байгууллагууд арга хэмжээний хэрэгжилт, холбогдох нотлох баримтыг уг системд байршуулаагүй, тухайн хариуцагч байгууллага болон дээд шатны /Засгийн газар/ байгууллагаас 2023 онд хяналт-шинжилгээ, үнэлгээг хийгээгүй байна.

Мөн ЭХЯ болон ЗГХХГ-ын холбогдох ажилтан Засгийн газрын 2020 оны 206, 2021 оны 374 дүгээр тогтоолоор баталсан “Бодлогын баримт бичгийн хэрэгжилт, захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам”-ын хавсралтын 4.4²¹, 5.2.4²² дэх заалтыг мөрдөж ажиллаагүйгээс 3.5.1 дэх зорилтын 3.5.1.5 дахь арга хэмжээг 2021-2023 онд /www.unelgee.gov.mn/-д байршуулаагүй, хяналт-шинжилгээ, үнэлгээг хийгээгүй байна.

“Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-гөөр баталсан 1046 арга хэмжээнээс “Төрийн мэдээллийн цахим систем”-д 783 арга хэмжээний нотлох баримтыг байршуулаагүйгээс “Бодлогын баримт

¹⁴ 5.2. Хяналт-шинжилгээ, үнэлгээ хийх албан хаагч нь дараах үүрэгтэй байна.;

¹⁵ “Цахим Монгол” арга хэмжээний хүрээнд олон улсын геодезийн сүлжээнд холбогдсон, байнгын ажиллагаатай станцуудаас бүрдсэн геодезийн хэмжил зүйн дэд бүтэц, хаягжилтын нэгдсэн системийг монгол орны нийт нутаг дэвсгэрийн хэмжээнд байгуулж, тэдгээрийн тоон мэдээллийг түгээх тогтолцоог үе шаттайгаар бий болгоно.;

¹⁶ Хувийн хэвшлийн санаачилгыг дэмжих замаар сумдын халуун усны болон нийтийн ахуйн үйлчилгээг сайжруулна.

¹⁷ Зах зээл болон байгалийн нөөц баялагт ойр, ажиллах хүчний хангалттай нөөцтэй, аж үйлдвэрийг хөгжүүлэх тааламжтай орчин бүрдсэн бүс нутгийг сонгон хилийн дагуух эдийн засгийн хамтын ажиллагааны бүс байгуулна.;

¹⁸ Хөдөө аж ахуйн тээвэр, борлуулалтын логиستيкийн сүлжээг байгуулж, хөдөө аж ахуйн бүтээгдэхүүний бэлтгэн нийлүүлэлтийн чанарын хяналт, баталгаажуулалтын оновчтой тогтолцоог бүрдүүлнэ.;

¹⁹ Чөлөөт бүсүүдийн хөгжлийн ерөнхий төлөвлөгөөнд тодотгол хийж “Замын-Үүд” чөлөөт бүсийг байнгын үйл ажиллагаанд оруулна.;

²⁰ Төрийн үйлчилгээнд мэдээлэл, харилцаа холбооны технологийн дэвшил, инновац нэвтрүүлэх замаар бүтээмж, үр ашгийг дээшлүүлнэ.;

²¹ Захиргаа, хүний нөөц, дотоод ажил хариуцсан нэгж бодлогын баримт бичиг, хууль тогтоомж, тогтоол, шийдвэрийн хэрэгжилт, байгууллагын үйл ажиллагааны тайланг нэгтгэх бөгөөд хяналт-шинжилгээ, үнэлгээний нэгж түүнд хяналт-шинжилгээ, үнэлгээ хийнэ. Төрийн албан хаагч бодлогын баримт бичиг, хууль тогтоомж, тогтоол, шийдвэрийн хэрэгжилт, байгууллагын үйл ажиллагааны тайланг тогтоосон хугацаанд үнэн зөв, бодитой гаргаж өгөх үүрэгтэй. Бодлогын баримт бичиг болон түүнийг хэрэгжүүлэх арга хэмжээний төлөвлөгөө боловсруулах шатанд хяналт-шинжилгээ, үнэлгээ хариуцсан ажилтан, нэгжээс төлөөлөл оруулан хамтран ажиллана.;

²² Тайлан дахь хүрсэн түвшний талаарх мэдээллийн үнэн, зөв эсэхийг нягтлан шалгах;

бичгийн хэрэгжилт, захиргааны байгууллагын үйл ажиллагаанд хяналт-шинжилгээ, үнэлгээ хийх нийтлэг журам"-ын 5.2.3-т "хяналт-шинжилгээ, үнэлгээний үнэлэлт, дүгнэлт, зөвлөмжийг хууль тогтоомж, баримт нотолгоонд үндэслэн гаргах" гэсэн нөхцөл бүрдээгүй байна.

ЗАСГИЙН ГАЗРААС ХӨТӨЛБӨРИЙН БИЕЛЭЛТИЙГ НОТЛОХ БАРИМТАД ҮНДЭСЛЭЖ ГАРГААГҮЙ, ХҮРСЭН ТҮВШНИЙ МЭДЭЭЛЛИЙН ҮНЭН, ЗӨВ ЭСЭХИЙГ БОДИТООР НЯГТЛАН ШАЛГААГҮЙ, ҮЕ ШАТТАЙГААР ЦОГТ ХЯНАЛТ-ШИНЖИЛГЭЭ, ҮНЭЛГЭЭГ ХИЙГЭЭГҮЙ, АРГА ХЭМЖЭЭНИЙ ҮР ДҮН ЗОРИЛТОО ХАНГАХАД ЧИГЛЭГДСЭН ЭСЭХИЙГ НЭГТГЭН ДҮГНЭЭГҮЙ БАЙНА

“Засгийн газрын 2020-2024 оны үйл ажиллагааны хөтөлбөрийг хэрэгжүүлэх арга хэмжээний төлөвлөгөө”-нд тусгагдсан 6 бодлого, 23 зорилго, 261 зорилтын хүрээнд 2021-2023 онд хэрэгжүүлэх 1046 арга хэмжээний 2021, 2022 оны биелэлтийг ЗГХЭГ-аас, 2023 оны биелэлтийг ЗГХХГ-аас тус тус гаргасан байна.

ЗГХЭГ болон ЗГХХГ-аас Засгийн газрын 2020-2024 оны үйл ажиллагааны хөтөлбөрийн 2021, 2022, 2023 он тус бүрийн хэрэгжилтэд хяналт-шинжилгээний үнэлгээ, дүгнэлтийг гаргахдаа хөтөлбөрийг хэрэгжүүлэгч үндсэн хариуцагч байгууллагаас “Төрийн мэдээллийн цахим систем”-д тайлагнасан тайланд үндэслэн журмын 5.2.3-т “хяналт-шинжилгээ, үнэлгээний үнэлэлт, дүгнэлт, зөвлөмжийг хууль тогтоомж, баримт нотолгоонд үндэслэн гаргах”, 5.2.4-т “тайлан дахь хүрсэн түвшний талаарх мэдээллийн үнэн, зөв эсэхийг нягтлан шалгах” гэсэн үүргээ хэрэгжүүлэхгүйгээр бодитой бус хяналт-шинжилгээ, үнэлгээг хийж байна.

Мөн Шадар сайдын ажлын албанаас “Эдийн засгийн бодлого”-ын 3.1.14²³, 3.1.17²⁴, 3.2.7²⁵, 3.7.14²⁶ дахь зорилтын 12 арга хэмжээний хэрэгжилтийг “Төрийн мэдээллийн цахим систем”-д “МУШС-ын эрхлэх асуудлын хүрээнд тухайн арга хэмжээ хамааралгүй байх тул холбогдох салбар, байгууллагад шилжүүлэх саналтай байна” болон “Чөлөөт бүсийн хөгжлийн бодлого төлөвлөлтийн асуудал МУШС бөгөөд ЭЗХС-ын эрхлэх асуудлын хүрээнд шилжсэн тул уг арга хэмжээний биелэлтийг ЭЗХЯ-аас гаргуулах саналтай байна” гэж оруулж 2023 онд Шадар сайдын ажлын алба, ЗГХХГ-аас дараах арга хэмжээнд “**хугацаа болоогүй**” гэсэн тайлбараар хяналт-шинжилгээ, үнэлгээг хийгээгүй байна.

ЗГХХГ-аас “Төрийн мэдээллийн цахим систем”-д тайлагнасан тайланд үндэслэн хяналт-шинжилгээ, үнэлгээг гаргаж байгаа нь журмын 7.2²⁷-ын 7.2.1-д “мэдээллийг цуглуулах, ангилах, нэгтгэх”, 7.2.2-т “зорилтын биелэлтийн дүнг үнэлэх”, 7.2.3-т “биелэлтийн үр нөлөөг үнэлэх”, 7.2.4-т “гадаад, дотоод хүчин зүйлийн нөлөөллийг үнэлэх”, 7.2.5-д “төлөвлөлт, хэрэгжилтийн харилцан хамаарлыг үнэлэх”, 7.2.6-д “биелэлтийн түвшинг үнэлэх”, 7.2.7-т “бодлогын баримт бичгийн төлөвлөлт, хэрэгжилтийг сайжруулах тодорхой санал боловсруулах” гэсэн үе шатаар цогц хяналт-шинжилгээ, үнэлгээ хийнэ гэсэн зарчмыг баримтлаагүй, арга хэмжээний хэрэгжилтийн үр дүн нь зорилтоо хангахад чиглэгдсэн эсэхэд нотолгоонд суурилан нягтлан шалгаж, хяналт-шинжилгээ, үнэлгээ хийгээгүй, нэгтгэн дүгнээгүй байна.

²³ Эдийн засгийн тэргүүлэх чиглэлийг дэмжсэн бодлого, хууль, эрх зүйн орчныг тодорхой болгоно.;

²⁴ Чөлөөт бүсүүдийн дэд бүтцийн бүтээн байгуулалтын ажлыг үе шаттайгаар хийж, экспорт болон дотоодын зах зээлд чиглэсэн худалдаа, үйлчилгээ, хөнгөн үйлдвэрлэлийг хөгжүүлэх нөхцөлийг бүрдүүлж, гадаад, дотоодын хөрөнгө оруулагчдыг дэмжиж ажиллана.;

²⁵ Хүнд үйлдвэрлэлийг хөгжүүлж, эрдэс түүхий эдийн боловсруулалтын түвшинг ахиулан, нэмүү өртөг шингэсэн бүтээгдэхүүн үйлдвэрлэнэ;

²⁶ Чөлөөт бүсүүдийн хөгжлийн ерөнхий төлөвлөгөөнд тодотгол хийж “Замын-Үүд” чөлөөт бүсийг байнгын үйл ажиллагаанд оруулна;

²⁷ 7.2. Бодлого, төлөвлөлтийн баримт бичгийн хэрэгжилтэд дараах үе шатаар цогц хяналт-шинжилгээ, үнэлгээ хийнэ.

ДҮГНЭЛТ

Аудитаар цуглуулсан нотлох зүйлс, аудитын дүнд үндэслэн дараах дүгнэлтийг гаргаж байна. Үүнд:

1. Засгийн газрын 2020-2024 оны үйл ажиллагааны хөтөлбөрийн 6 бодлого, 23 зорилго, 261 зорилт бүхий 1046 арга хэмжээний 2021-2023 оны хэрэгжилтэд аудит хийхэд хөтөлбөрт оролцогч талуудын ажлын уялдаа холбоо хангалтгүй, арга хэмжээнд шаардлагатай төсөв хөрөнгө нь батлагдаагүйгээс тухайн зорилт, арга хэмжээний хэрэгжилт зорилтот үр дүнд хүрээгүй, хөтөлбөрийн биелэлт **70.5 хувьтай** байна.
2. Дээрх 6 бодлогын 2021-2023 оны хэрэгжилтийг авч үзэхэд “Ковид-19” халдварт цар тахлаас үүдэлтэй эдийн засаг, нийгмийн хүндрэлийг даван туулах бодлого **83**, Хүний хөгжлийн бодлого **67**, Эдийн засгийн бодлого **59**, Засаглалын бодлого **74**, Ногоон хөгжлийн бодлого **67**, Нийслэл ба бүс, орон нутгийн хөгжлийн бодлого **73 хувийн** биелэлттэй байна.
3. Засгийн газрын 2020-2024 оны үйл ажиллагааны хөтөлбөрт 2021-2023 онд Улсын төсөв, гадаадын зээл тусламж, Засгийн газрын тусгай сан, хувийн хөрөнгө оруулалт, хандив, тусламж зэрэг санхүүгийн эх үүсвэрээр 835 арга хэмжээг нийт 89,262.8 тэрбум төгрөг шаардлагатай гэж төлөвлөснөөс мөн онуудад 728 арга хэмжээнд нийт 34,803.2 тэрбум төгрөгийн хөрөнгийг зарцуулсан ч эрчимжүүлэх шаардлагатай, үр дүнгүй арга хэмжээ 396 буюу 37.9 хувийг эзэлж байна.
4. Хөгжлийн бодлого, төлөвлөлтийн дунд хугацааны баримт бичгийн хэрэгжилтийн нотлох баримтыг Засгийн газрын Төрийн мэдээллийн нэгдсэн цахим системд оруулж хэвшээгүй, арга хэмжээний хэрэгжилтийн тайланд үндэслэдэг, нотлох баримтад тулгуурлан нягтлан шалгахгүйгээр шат шатны хяналт-шинжилгээ, үнэлгээ, дүгнэлтийг гаргаж байгаа нь хөтөлбөрийн үр дүн, үр нөлөөг бодитой үнэлж дүгнэх үндэслэл болж чадаагүй, хяналтын тогтолцоо сул байна.
5. Засгийн газрын 2020-2024 оны үйл ажиллагааны хөтөлбөрийг хэрэгжүүлэгч төрийн захиргааны төв байгууллага, түүний дотоод хяналт-шинжилгээ, үнэлгээний нэгж, мөн Засгийн газрын Хяналт хэрэгжүүлэгч газар нь хөтөлбөрийн үр дүнд бий болсон бүтээн байгуулалт, түүнд зарцуулсан хөрөнгийг нэгтгэн тайлагнаагүй байна.
6. Засгийн газрын 2020-2024 оны үйл ажиллагааны хөтөлбөрийн хяналт-шинжилгээ, үнэлгээний 154 шалгуур үзүүлэлтийн хүрэх түвшинтэй Монгол Улсыг 2021-2025 онд хөгжүүлэх таван жилийн үндсэн чиглэлийн 61 шалгуур үзүүлэлт уялдаж хэрэгжсэнээс 2021-2023 оны үр дүнгээр 17 шалгуур үзүүлэлтийн үр дүн нь хангагдаж 27.9 хувийн хэрэгжилттэй байна.
7. Засгийн газрын 2020-2024 оны үйл ажиллагааны хөтөлбөрийг хэрэгжүүлэх явцад босоо болон хэвтээ тогтолцоондоо төрийн захиргааны төв байгууллага хамтарч ажиллах зохион байгуулалтын арга хэмжээ авч хэрэгжүүлээгүйгээс зарим зорилт, арга хэмжээ зорилтот үр дүнд хүрээгүй байна.

ЗӨВЛӨМЖ

Аудитын дүн, дүгнэлт нотлох зүйлст үндэслэн дараах зөвлөмжийг өгч байна. Үүнд:

Монгол Улсын Ерөнхий сайд Лувсаннамсрайн Оюун-Эрдэнэ танаа:

- 1.** Цаашид Хөгжлийн бодлого, төлөвлөлтийн дунд хугацааны хөтөлбөрийг боловсруулахдаа оролцогч талуудын чиг үүрэгт нь нийцүүлэн харилцан уялдаатай хамтран ажиллахаар төлөвлөж, зорилт, арга хэмжээг хэрэгжүүлэхэд шаардлагатай төсөвлөлтийн шинжилгээ хийж, санхүүжилтийн олон эх үүсвэрийг бүрэн дайчилж хэвших;
- 2.** Засгийн газрын 2020-2024 оны үйл ажиллагааны хөтөлбөртэй уялдаж Монгол Улсыг 2021-2025 онд хөгжүүлэх таван жилийн үндсэн чиглэлд тусган хэрэгжиж буй 44 шалгуур үзүүлэлтийн хүрэх түвшин, үр дүнг нийгэм, эдийн засагт үзүүлэх үр нөлөөг хангахуйцаар бүрэн хэрэгжүүлэх;
- 3.** Засгийн газрын Хяналт-шинжилгээ, үнэлгээний мэдээллийн цахим системд хөгжлийн бодлого, төлөвлөлтийн дунд хугацааны баримт бичигт тусгагдсан зорилго, зорилт, арга хэмжээг бүрэн хамруулж, хүрсэн үр дүнг нотлох баримтад үндэслэн үнэн зөв, бодитой тайлагнаж байх;
- 4.** Хөгжлийн бодлого, төлөвлөлтийн дунд хугацааны баримт бичигт тусгасан зорилго, зорилтыг хэрэгжүүлэх төсөл, арга хэмжээний хэрэгжилтийг үнэн зөв тайлагнасан эсэхэд хяналт тавихдаа хүрсэн үр дүнг нотлох баримтад үндэслэн нягтлан шалгаж, Засгийн газрын 2020 оны 206 дугаар тогтоолоор баталсан журмын 7.2-т заасны дагуу цогц хяналт-шинжилгээ, үнэлгээг хийж, дүгнэлт гаргах.

Төсвийн ерөнхийлөн захирагч болон хэрэгжүүлэгч байгууллагын дарга нарт:

- 1.** Цаашид Хөгжлийн бодлого, төлөвлөлтийн дунд хугацааны хөтөлбөрийн төслийг боловсруулахдаа тухайн зорилт, арга хэмжээний шалгуур үзүүлэлт, хүрэх түвшинг тоон болон чанарын утгаар хэмжигдэхүйцээр илэрхийлж, хамтран хэрэгжүүлэгч талуудтай харилцан уялдаатай, хамтран ажиллах чиглэл, саналыг тусгаж байх;
- 2.** Хөгжлийн бодлого, төлөвлөлтийн дунд хугацааны хөтөлбөрт дэвшүүлсэн зорилт, арга хэмжээг хэрэгжүүлэхэд шаардлагатай төсөвлөлтийн шинжилгээ хийж, төсөв хөрөнгийг жил бүрийн төсвийн хүрээний мэдэгдэл, улсын төсөвт тусгах саналыг хүргүүлж, санхүүжилтийн олон эх үүсвэрийг бүрэн дайчилж хэрэгжүүлэх;
- 3.** Хөгжлийн бодлого, төлөвлөлтийн дунд хугацааны баримт бичигт тусгасан зорилго, зорилтыг хэрэгжүүлэх төсөл, арга хэмжээний хэрэгжилт, хүрсэн үр дүнг нотлох баримтын хамт Засгийн газрын Хяналт-шинжилгээ, үнэлгээний мэдээллийн цахим системд үнэн зөв тайлагнаж, Засгийн газрын 2020 оны 206 дугаар тогтоолоор баталсан журмын 5.2.3-т заасан үүргийг хэрэгжүүлж ажиллах.